

DOMENIE XII «VIE PAL AN» Jutoris pe Liturgjie

Ai 25 di Jugn dal 2017

Passât il timp di Pasche e lis ultimis solenitâts, la liturgjie e torne a cjapâ in man il vanzeli di Matieu, l'amî che nus compagne vie par chest an. O sin al cjapitul 10: Gjesù al da istruzions ai apuestui che al sta mandant tes borgadis de Galilee e ur racomande di vinci la pôre, di cjapâ fiducie e di lâ indevant cun corajo. Disint cussì, ju vise che la lôr mission no sarà facile: metisi cui ultims, manda fûr i idui dai demonis di mode, nunziâ il ream di Diu, ur costarà sudôr di sanc.

In chest - No vês di vê pôre dai oms - il nestri pinsîr al va ancje a chês personis che a patissin persecuzion pal ricognossiment dai dirits dal om, parcè che a àn sielt di stâ de bande dai debui o a motîf de peraule dal vanzeli. Ma il pinsîr al pues ancje cori ai perseguitâts des disgraciis, a chei che a sintin il faliment de lôr vite, ai deprès so redut zovins in continui aument... A valin ancje par lor i avvertiments dal Vanzeli di vuê.

Intant la Antifone di jentrade de messe nus dîs:

Antifone di jentrade cf. Sal 27,8-9

**Il Signôr al è une fuarce pal so popul,
pal so consacrât une crete di salvece.
Salve il to popul, Signôr,
benedis la tô ereditât e indrecile par simpri.**

Colete

Danus la gracie, Signôr,
di vê pal to non sant un timôr simpri compagnât dal amôr,
parcè che no tu lassis mai cence la tô guide
chei che tu ju âs inlidrisâts su la fonde dal to amôr.
Pal nestri Signôr Gjesù Crist to Fi, ch'al è Diu
e cun te al vîf e al regne dutune cul Spirtu Sant,
par ducj i secui dai secui.

PRIME LETURE

Gjer 20,10-13

Il Signôr al à liberade la vite dal puâr des sgrifis dal trist.

La leture nus presente un tocuto dal diari, de autobiografie di Gjeremie che al à profetât dal 622 p.d.C a dopo dal 587 p.d.C.

Gjeremie al à patît une vore, al veve ducj cuintri e seont la tradizion al è muart profugo in Egjit, copât dai siei.

Il profete perseguitât, te sô desolazion i dîs al Signôr: la mê cause te ai lassade a ti.

Chestis a son ancje lis peraulis dai tribulats di vuê che a puartin un magon dentri e che dome la fiducie tal Signor ur da la fuarce di continuâ a vivi.

Dal libri dal profete Gjeremie

Al disè Gjeremie: «O ai sintudis lis cjâcaris di tancj di lôr:

«Terôr dulintor!

Denunciait e lu denunciarin!».

Ducj i miei amîs

a spietin che m'incopedi:

«Salacor si lasse imbroiâ

e cussì o rivarìn a vincilu,

si svindicarî cuintri di lui!».
Ma il Signôr al è cun me tant che un fuart plen di vigorie,
par chel i miei persecutôrs
a cloparan, e no le varan vinte;
a varan grande vergogne parcè che no ur larà drete:
vergogne eterne, che no si le dismentearà par mai!
Ma tu, Signôr des schiriis,
tu scrutinis cun justizie,
tu viodis i rognons e il cûr.
Jo o gjoldarai dal to svindic cuintri di lôr,
parcè che la mê cause te ai lassade a ti.
Cjantait al Signôr,
laudait il Signôr,
ch'al à liberade la vite dal pûar
des sgrifis dal trist!
Peraule di Diu.

SALM RESPONSORIÂL

dal Salm 68

Leint chet salm, al ven di pensâ a Ane, femine di Elkane, in chel fat comovent che si lei tal prin libri di Samuel ciapitul 1 versets 1-18. Ane, tal santuari di Silo, tal marum dal so spirt e preave il Signôr e si passeve dome di vaî intant che il predi Eli i cridave di no tirâle trop a lunc, cjoche come che tu sês.

Se o prein chest salm, ricuardin i moments de vite li che no rivavin a parâsi e tignin dongje di nô i perseguitâts, i profugos, lis personis che vuê a vain, a prein, a disin ancje lôr:

Tal to boncûr cence fin scoltimi, Diu, che tu sês fedêl tal dâ salvece.

R. Tal to grant boncûr rispuidimi, o Diu.

Se cjantât: Il cjant dai salms reponsoriâi, p.62

Par colpe tô mi an cjamât di ofesis
e la mê muse e je plene di vergogne.
O soi diventât un forest pai miei fradis,
un strani pai fis di mê mari.
Parcè che la passion pe tô cjase mi à consumât
e lis ofesis di chei che ti svilanin mi son plombadis parsore. **R.**

Ma jo, Signôr, ti fâs la mê preiere;
ch'al puedi jessi chest, o Diu, un timp di gracie.
Scoltimi, Signôr, parcè che la tô misericordie e je tant dolce;
tal to boncûr cence misure dami une des tôs cjaladis. **R.**

Cjalait, puare int, e indalegraitsi,
e vualtris ch'o cirîs Idu,
che il vuestri cûr al cjapi fuarce.
Parcè che la puare int il Signôr al scolte
e i siei presonîrs nol bute di bande.
Che lu laudin i cîi e la tiere,
i mârs e dut ce ch'al nade dentri. **R.**

SECONDE LETURE

Il don de gracie nol è compagn dal fal.

Rm 5,12-15

O vin za dit: cuant che Pauli si vistìs di fieste cui siei studis universitaris di teologjie, e je grivie rivâ a stâi daûr. Al è il câs di cheste seconde leture.

In sostanze: ancje se o sin a lis provis che pecjât e muart a son colegâts, o vin ancje la fiducie di podê dî: cetant miei il boncûr di Diu e il regâl dal boncûr di un om sôl, Gjesù Crist, si è stranfât sui tancj. E je cheste la nestre sperance cristiane; par nô e pe umanitât interie.

De letare di san Pauli apuestul ai Romans

Fradis, come che midiant di un om sôl il pecjât al è jentrât tal mont e cul pecjât la muart, cussì ancje la muart e je rivade a ducj i oms, parcè che ducj a an pecjât. Di fat fintremai a la leç il pecjât al jere tal mont, ma un pecjât nol ven metût in cont se no je la leç. Epûr la muart e à fat di parone espotiche, di Adam fint a Mosè, ancje sun chei che no vevin pecjât, par chê lôr colegance cu la trasgression di Adam, ch'al è figure di chel ch'al veve di vignî.

Ma il don de gracie nol è compagn dal fal. Di fat se pal fal di un sôl a son muarts in tancj, cetant miei il boncûr di Diu e il regâl dal boncûr di un om sôl, Gjesù Crist, si è stranfât sui tancj. Peraule di Diu.

CJANT AL VANZELI

cf. Zn 15,26.27

R. Aleluia, aleluia.

Il Spirt di veretât lui mi fasarà di testimoni,
al dîs il Signôr,
e ancje vualtris o podarês fâmi di testimoniis.

R. Aleluia.

VANZELI

Mt 10,26-33

No stait a spaventâsi par chei che a puedin copâ il cuarp.

Gjesù al sa che un cambiament de societât nol domande cjacaris ma sacrificis e al sa che lis dificoltàts a son tantis e grandis; par chel al racomande: No vês di vê pôre dai oms... No stait a spaventâsi par chei che a puedin copâ il cuarp... No stait a vê pôre, duncje...

L'impuartant al è che nô o rivìn a predicjâ il mes di Gjesù sui cuvierts cu la nestre vite, e che o vebin a ricognossilu e testimoneâlu devant dai oms.

Pes consequencis, o vin di ponisi te fiducie in Diu parcè che daprûf di lui o valìn ben plui di une vore di passaris!

Dal vanzeli seont Matieu

In chê volte, Gjesù al disè ai siei dissepui: «No vês di vê pôre dai oms. Nol è nuie di taponât che nol vedi di jessi palesât e di platât che nol vedi di jessi savût. Ce che us dîs a vualtris tal scûr, disêtlu inte lûs; ce che o sintîs inte orele, predicjaitlu sui cuvierts. No stait a spaventâsi par chei che a puedin copâ il cuarp, ma che no rivin a copâ l'anime. Vêt pôre pluitost di chel che al à il podê di fâ finî te Gheene tant l'anime che il cuarp. Dôs passaris no si vendino forsît par une palanche? Poben, nancje une di lôr no colarà cence che il Pari vuestri lu vueli.

Parfîn i cjavêi dal vuestri cjâf a son stâts contâts ducj. No stait a vê pôre, duncje: vualtris o valês ben plui di une vore di passaris!

Pa la cuâl, se un mi ricognossarà denant dai oms, ancje jo lu ricognossarai denant dal Pari gno ch'al è tai cîi. Se invezit mi rinearà denant dai oms, ancje jo lu rinearai denant dal Pari gno ch'al è tai cîi. Peraule dal Signôr.

Su lis ufiertis

Acete, Signôr, il sacrifici di pacificazion e di laude e fâs che, purificâts di cheste nestre azion, o podìn ufrîti un cûr ben disponût e che ti plasi.

Par Crist nestri Signôr.

Antifone a la comunion

Sal 144,15

I vôi di ducj viers di te si voltin e a spietin,
e tu tu ur dâs di mangjâ su l'ore juste.

O ben: Zn 10,11.15

Al dîs il Signôr: Jo o soi il bon pastôr
e o rimet la mê vite pes pioris.

Daspò de comunion

Diu, che tu nus âs fats tornâ gnûfs
cul Cuarp sant e cul Sanc prezios di to Fi,
danus pal to boncûr di cjatâ une redenzie sigure
in ce ch'ò fasìn dispès e cun devozion.
Par Crist nestri Signôr.

* * *

Riflession di pre Antoni Beline: **Berlâ la veretât**

Chest toc di vanzeli al è cjamât di veretâts e di propuestis e di sigurazions, che si podarès sielzi o une glagn o un'altre. Prime di dut Crist nus dîs di no vê pôre, che il timp al è galantomp e che la veretât e saltarà fûr. Siguramentri la di dal judizi, cuant che lui al clamarà denant di sé ducj i popui e ju dividerà un dal altri come che il pastôr al divît lis pioris di cjastrons. Se al è pussibil, però, la veretât, ancje la plui platade e saltarà fûr...

Vanseli par un popul, an A, p. 155

* * *

Cjants

Come a l'aghe de fontane, *n. 135*;

Quanta sete nel mio cuore, *n. 136*;

Salm 30: O met la mê vite tes tôs mans, *n. 245*;

Salm 33: O vuei benedî il Signôr cence polse, *n.246*.

Tal libri Hosanna, si puedin cjatâ ancjemò altris cjants e salms adats a la liturgjie di cheste domenie.

* * *

*Tu pues interrompi il to stâ cidin,
ma dome par dî alc
che al è plui impuartant dal tasê.*

Pitagora

* * *

- * *I cjants, salms e cjantadis a vegnin ripuartâts cu la numerazion dal libri: Hosanna, Cjants e preieris dal popul furlan, Ed. Glesie Furlane, 2012.*
- * *Il cjant dai salms resposoriâi, Ed. Glesie Furlane, 2012.*

- * *50 corâi de cristianitât todescje voltâts par furlan, ed. Glesie Furlane, 2016.*
- * *Il libri des riflessions sul Vanzeli al è: pre Antoni Beline, Vanzeli par un popul, an A, Ed. Arti Grafiche Friulane.*
- * *Par domandâ chescj libris scrivêt a info@glesiefurlane.org*